



JU Bosanski kulturni centar Kantona Sarajevo
Branilaca Sarajeva 24, 71000 Sarajevo
IDB: 4202093300005

Kategorizacija radova u časopisu **Obrazovanje odraslih**

Naučne radove recenziraju najmanje dva recenzenta iz odgovarajućeg naučnog područja i određuju kategoriju članka. UDC broj dodjeljuje stručnjak za bibliotečku klasifikaciju.

Vrste radova

Izvorni naučni rad (Original scientific paper) – naučni članak koji sadrži neobjavljene i nove rezultate originalnih teorijskih promišljanja i praktičnih istraživanja u potpunom se obliku kategorizira kao izvorni naučni rad. Karakterizira se kao izvorni rad kada daje doprinos određenoj naučnoj problematici ili njenom razumijevanju i kada opisuje nove rezultate teorijskih i/ili empirijskih istraživanja iz neke oblasti. Rad je napisan tako da bilo koji stručnjak koji se bavi istim područjem na osnovu navedenih informacija može ponoviti primjenu istraživačkog dizajna i postići opisane rezultate s jednakom tačnošću ili unutar granica pogreške koje navodi autor ili može ponoviti autorova zapažanja, teoretske navode ili koncepte koje propituje u novim uvjetima, s novim uvidima vezanim za isti fenomen.

Pregledni rad (Review paper) – naučni članak koji sadrži originalan, sažet i kritički prikaz jednog područja teorije ili praktičnih istraživanja, u kojemu autor i sam aktivno kritički sudjeluje. U radu mora biti naglašena uloga autorovog originalnog doprinosa tom području u odnosu na već objavljene radove, kao i pregled tih radova. Takav rad kategorizira se kao pregledni naučni rad. Sadrži cjelovit prikaz stanja određenog područja teorije ili njene primjene. Autor donosi vlastiti kritički osvrt i ocjenu, te obavezno navodi podatke o svim objavljenim radovima koje je koristio kao polazište za svoj rad.

Stručni rad (Professional paper) – sadrži korisne priloge za unapređenje praktične djelatnosti u određenoj struci, ali ne predstavlja originalan doprinos naučnoj spoznaji. U ovu kategoriju mogu se svrstati istraživanja iz prakse (studije slučaja, evaluativne studije i sl.), pregledni stručni radovi ili izlaganja na stručnom skupu.

Ostali nekategorizirani radovi kao što su recenzije, prikazi, izvještaji i dokumenti objavljuju se u posebno za to predviđenom dijelu časopisa.